

# CH'EST POS EIN CONCOURS !

Cabaret Walleon - Filles Celles Picardes: in v'là deux belles sociétés! Et i-in a d'z'éautres avec, qu'i n'eont qu'eine seule imbitieon, ch'est d'apporter de l' gaieté à les gins qui veont les vir, dins ç' bieu langache qu'on a dins s' coeur. D'puis ein p'tit moumint, in lisant les gazettes obin in orwettiant l' télévisieon locale, on a l'impressieon qu' les journalisteus i s' creot'tent obligés d'invinter eine rivalité inter les heommes et les feimmes: par eximpe, dins l'dossier su l'z'électieons communales, on a d'mindé à quate politicien(ne)s ed' dire leu préférinte su des sujets d' tous les sortes. Et bin sûr, on leu z'a d'mindé: Cabaret Walleon ou Filles Celles Picardes? Là, j' deos dire que pour eine feos, i z'eont tertous bin répeondu, vu qu'i n'eont pos voulu répeonte! J' pinse bin qu' ch'éteot eine répeonse pus intelliginte que l' questieon!

A l' télé, on peut vir ein commintaire ainsin su les Filles Celles Picardes: «el' cabaret traditionnel i n'a qu'à bin s' tenir, pasque les feimmes, i z'eont d' l'av'nir dins l' picard». Eh bé j'espère bin! Je n' pinse pos qu' les heommes du Cabaret Walleon i dis'tent l' cantraire... Eul meilleure prouèfe, ch'est qu' les deux groupemints i s'eont ortrouvés insanne su l' scène au meos d'octope pou les Grands Cabarets, et eine paire

de feos pendant l'année passée. Acor mieux, l' Cabaret «traditieonnel», comme i dis'tent, i-a pus d'eine feos deonné l' soutien à les Filles... Et même si alfeos, l'ein comme l'éaute, i s' feont indever eine millette, ch'est toudis avec bramint d'humour et sans pus d'méchanceté.

I-a seur'mint des sujets qu' les feimmes i traitent mieux qu' les heommes, et l' cantraire i-est vrai avec. Mais mi, ç' que j' veos, ch'est qu' tertous, heommes ou feimmes, i ouèf'tent pour el' picard tournaisien. Et pour cha, tous les initiatives seont beonnes, i n'a pos d' camparaiseons à faire, obin d' concours ou d' rivalité.

Bruno Delmotte i-a traduit deux albums de Tintin in picard? Bravo! El' Bistreet Patoisant i va bêteôt fiêter ses dix ans? Proficiat! On jeu des pièces et des sketches in patois à Froyennes, à Saint-Antouane, et au cabaret des P'tits Rambilles? Acor toudis tant mieux! Les Filles Celles Picardes i veont commincher leu deuxième année l' 20 janvier? J' vas aller vir! Et l' Cabaret Walleon (bêteôt chint'naire!) i r'comminche eine saison l' 21 janvier? Je n' vas pos l' louper!

«Et le gagnant est»: TOURNAI! ET S' BIEAU PATOIS!